

Visoki predstavnik poziva na hitnu reformu obrazovnog sistema u BiH

Visoki predstavnik, Wolfgang Petritsch, danas je pozvao organe koji su nadležni za obrazovanje na svim nivoima vlasti u Bosni i Hercegovini da iskorijene "neprihvatljive običaje koji su se ustalili u dugom i teškom periodu rata i stagnacije", te kao najviši prioritet postave stave reformu obrazovnog sistema.

U svom obraćanju zvaničnicima i akademikima na konferenciji o budućem razvoju Univerziteta u Sarajevu, Visoki predstavnik je istakao da je jedan od razloga zašto mladi ljudi žele napustiti Bosnu i Hercegovinu upravo neadekvatan obrazovni sistem, sa lošom opremljenošću, staromodnim nastavnim metodama, i nedovoljno standardiziranim kvalifikacijama, koji je odsječen od novih istražnih i nastavnih trendova u drugim dijelovima Evrope.

"U posljednjih šest godina nakon potpisivanja Daytonu, međunarodna zajednica bila je okrenuta održavanju mira i ponovnom pokretanju ekonomije," istakao je Visoki predstavnik. "Nevladine organizacije su uložile puno napora vrijednih hvale ne bi li došlo do pozitivnih pomaka na polju obrazovanja, no možda ovoj oblasti nije poklanjano dovoljno pažnje, barem kada su u pitanju vodeće organizacije. No, postalo je jasno da će, sve dok sektor obrazovanja bude davao rezultate koji su daleko ispod očekivanih, to predstavljati prijetnju za ekonomsku i socijalnu budućnost Bosne i Hercegovine i njene izgleda za integraciju u Evropu."

Visoki predstavnik je apelovao da se broj univerziteta u BiH smanji sa sedam na četiri, te zagovarao racionalizaciju

postojećeg sistema, u kojem se javna sredstva dodjeljuju pojedinačnim fakultetima a ne univerzitetima u cjelini. Rekao je da je rezultat toga činjenica da se novac koristi na neefikasan i netransparentan način. Također je pozvao na neodložno pristupanje Lisabonskoj konvenciji o priznavaju visokoobrazovnih kvalifikacija. Trenutno diplome bosanskohercegovačkih univerziteta nisu univerzalno priznate, čak ni u samoj zemlji. Visoki predstavnik je također apelovao na entitetske ministre obrazovanja da poduzmu potrebne pripreme da Bosna i Hercegovina postane potpisnica deklaracije usvojene u Bolonji 1999. godine. To bi pružilo priliku bosanskohercegovačkim studentima da koriste prednosti Evropskog sistema za prijenos studijskih bodova, koji studentima omogućava da dijelove studija pohađaju na različitim univerzitetima.